



Occision faite par le Roy Herodes, des enfans Innocens de Iudée, pensant occir Iesus-Christ.

VAND le Roy Herodes connut estre deceu du retour des Sages d'Orient, lesquels ayans trouué & adoré Iesus, s'estoient retirez par autre chemin, sans retourner par Ierusalem, ainsi que diuinement ils auoient esté aduertis par l'Ange du Seigneur : Herodes connoissant son attente estre vaine, eut crainte que son regne ne fut supprimé par la naissance d'un nouveau Roy des Iuifs : parquoy il resolut d'y donner ordre, & pour asseurer son regne, ne trouua moyen plus expedient, que de faire promptement mettre à mort par ses satellites, tous les enfans aagez de deux ans, & au dessous, qui estoient nais en Bethleem, & es marches de cette contrée, afin que dans cette cruelle occision, l'enfant Iesus y fut occis. Ce meurtre brutal ne fut pas sans grande horreur & desolation des meres plorans leurs petits & chers enfans, de sorte que les Iuifs pouuoient lors bien dire, Ores est accomplie la Prophetie de Ieremie, disant ; la voix a esté ouïe en Rama, complaints, pleurs, & grandes lamentations. Rachel plorant ses enfans, & n'a voulu estre consolée, pource que c'en est fait.